

Ri tinamit Paxil Kayala rajawaxik kresaj ronojel taq k'axk'olil tajin kkiriq tinamit waralib' taq winaq. Kcha' ri ajno'j rech ONU.

(pa ri julajuj q'ij rech ik' mayo junab' juq'o' wajxaqlajuj) jela' GINEBRA, Ri nim ajno'j rech ONU Victoria Tauli-Corpuz, xtzijon pa uwi' ri ya'tal chi kech ri waralib' taq winaq, jawi xuya ub'ixik ri umayowem pa uwi' ri k'axk'olil kb'an chi kech ri tinamit taq winaq pa Paxil Kayala', are taq xch'aw pa uwi' ri meb'a'il, ri wi'jal, ri ke'esax pa kulew xuquje' ri e terne'm rumal q'atb'al tzij.

Sib'alaj kinmayowik rumal chi man k'ot junamil pa we amaq' xuquje' man k'ot tob'anik kkib'an ri q'atb'al taq tzij chech uchupsaxik ri tasonem pa uq'atil taq wokaj xuquje' man kq'at ta kan urajil kito'ik ri aj waral taq tinamit, xcha' ri ajno'j: Tauli-Corpuz.

"Are taq in k'o pa we amaq', xqamulij qib' kuk' e k'i mayab' taq winaq ri elesam b'i pa kulew ruk' ch'a'ojil, man xya' ta uq'ij ri kirajawaxik. Xuquje' xe'insolij jalajoj k'amal taq b'e e okisam pa che' rumal q'atom q'atb'al tzij chi kij, esam uwi' ri q'atatal chi kij xa rumal sib'alaj taq q'ij xetz'api' pa che'".

"Ri qas uxe'al we k'axk'olil are kb'anowik chi man k'ot chajinem chi kech ri kiloq'om kulew ruk' ri q'atb'al tzij, Pa Paxil Kayala man k'ot jun taqanik on jun chakub'al rech kchajix ri ya'tal chi kech ri waralib' taq winaq ruk' ri kulewal, ri kik'iche'laj xuquje' ri jalajoj taq kiq'inomal. E k'i ri e ya'om kanoq, man kekowin taj kkito' kib' chi uwach ri k'axk'olil xuquje' b'anom jalajoj taq cholchak ri man kta' ta chi kech xuquje' man ke'uto' taj".

"Ri il makaj chi kij ri mayab' k'amal taq b'e ri kkitzujukub' e'al xuquje' utaqanik ri kk'ulmataj ruk' taq ri kulew, xa kunimarisaj ri k'ax pa taq ri tinamit. Rumal wa' rajawaxik chi ri Paxil Kayala kutzujukub' xuquje' kuk'am uq'ab'il umajik taq ri chak rech ksach uwach ri k'axk'ol k'o pa ronojel taq ri q'atb'al tzij".

"K'isb'al nutzij, kwaj kinya kan ub'ixik, ri tinamit Paxil Kayala, k'o jun uk'as maja' na kutoj chi kech ri waralib' taq winaq ri xkik'ulumaj k'axk'olil are taq xb'an pa taq ri ch'a'oj. "Wene k'ate tajin kmaj utojik ri k'asaj, pacha' ne' ri uta'ik q'atb'al tzij chi rij ri Sepur Zarco, junalik kech'uq na ri ajmakib' xuquje' man ya'om ta uq'ij ri tz'aqat tob'anem, man b'anom ta uchakuxik xuquje' ronojel ri nik'aj chik tojonem man xtaqex ta chik".